



Nos Compromiso Civico

Programa Pragmatico di

DEMOCRACIA REAL pa Eleccion Parlamentario 2013

E titulo di nos Programa di Gobernacion, ta papia pa su mes, Democracia Real ta haci un compromiso cu Pueblo di Aruba cu locual nos ta bisa den campaña, nos lo trata di realisa den gobernacion. Tur cos transparente y nada scondi.

Asina abo votado por husga nos palabranan y trabounan na e siguiente eleccion.

Den e forma di hiba politica na Aruba, Partido Democracia Real kier trece cambio. Un cambio unda bo opinion tambe ta conta, unda bo persona lo ta central y e interes general di pais Aruba ta na prome luga.

P'esey nos ta ofrece bo e compromiso aki...y haci bo di nobo parti di e proceso democratico.

Esey ta Democracia, esey ta Partido Democracia Real!

Mr. Andin C.G. Bikker



Introduccion

Despues di 12 aña cu Aruba a wordo goberna pa cada bes un solo partido (8 aña di partido MEP y 4 di partido AVP), e situacion di e isla a bira hopi preocupante.

Algun ehempel:

- e gastonan publico ta sigui aumenta sin cu tin fondo pa cubri esakinan;
- no a desaroya pilarnan di economia nobo y pa colmo Aruba a perde un di su dos pilarnan di economia. Awor tin solo uno, cu ta haciendo e isla hopi vulnerabel;
- e debe nacional ta na caminda pa yega 5 biyon florin, di locual e gobierno actual su so a aument'e cu casi 2 biyon den menos cu 4 aña;
- criminalidad ta sigui halto y hasta ta birando mas violento;
- pobreza a aumenta.

E ta mas cu claro cu mester frena e desaroyo negativo aki prome cu e bira permanente. Den e cuadro aki, Partido Democracia Real (PDR) kier laga bo cera conoci cu nos ideanan con nos tin pensa pa duna gobernacion un contenido real enbes di puro politica bieu, di promesa falso y sin contenido.

E documento aki tin un vision realistico y alcansabel su tras cu a wordo desaroya pa nos hendenan local cu conoce e situacion, cu ta experiencia esaki diariamente y cu tin curason pa mira e isla aki regresa na e nivel unda e tabata of miho. Partido Democracia Real no ta un partido di plan, show of mentira. E partido aki a demostra, cu e ta un partido cu ta concentra riba solucion.

Debi na tempo y espacio mester tene cuenta cu e programa kisas no ta cubri tur area cu merece atencion, pesey PDR den gobernacion semper lo keda sondea kiko ta e preocupacionan cu ta biba den Pueblo y tene cuenta cu desaroyonan nobo.

Como ciudadano bo merece un mihor calidad di bida. Esey Partido Democracia Real ta ofrece bo. Duna nos un oportunidad real pa demostra cu por diferente y mihor!

Trabaonan di nos partido den Parlamento

Ehempel di concepto di Leynan y Amiendanan:

1. amienda pa defensa propio den cas of negoshi;
2. ley pa reconoce diploma di esnan cu studia medicina den region;
3. ley pa baha gasto mensual di coriente via introduccion di tarifa reduci anochi, rebaho di invoerrechten riba airco 'inverter' y luznan LED, introduccion di meternan prepago, red inteligente ('smart grid') y plan di energia;
4. amienda pa por apela den caso di belasting te na Corte Supremo;
5. amienda pa baha winst y inkomstenbelasting pa empresa mediano y chikito pa stimula economia;
6. amienda pa kita e obstaculonan fiscal cu ta stroba fundacionnan caritativo y di deporte haya donacion;

Presupuesto alternativo cu amiendanan pa entre otro:

7. introduci 'Crime Alert' (burgernet.nl) pa combati criminalidad;
8. introduci permiso pa por practica e deporte di pisca cu harpun;
9. introduci mediacion ('mediation') den caso di belasting;

10. introduci 'pre-clearance' ora biaha pa Corsou, Sint Maarten y Boneiro;
11. subsidio pa meternan di coriente prepago;
12. Mocion y proposicion pa baha tarifa di belasting di auto y taxi cu ta core riba diesel;
13. Introduci un Pré-Concepto di Ley pa Mehora e Proteccion Legal ora ta Diferencia di Opinion cu Siad (Belastingdienst) riba e cobransanan di Belasting ('landsverordening verbetering rechtsbescherming in belastingzaken');
14. Concepto di ley pa Reorganisa Debe Personal ('landsverordening voorkoming onnodige insolventies');
15. Ley pa Limita Embargo riba Salario Minimo, pa garantisa un nivel di bida y preveni problema Social ('landsverordening tot garantie van een bestaansminimum').

Nos compromiso cu e Pueblo pa 2013-2017:

Husticia y Seguridad

1. Lo combati e criminalidad creciente, cual ta asotando nos poblacion y ta afecta nos bishitantenan, cu man duro a base di un plan concreto, den un forma structura y consistente. Asina lo preveni y combati e.o. hortamento di auto, den hogarnan y atraconan;
2. Lo introduci 'Crime Alert' (burgernet.nl) pa yuda combati criminalidad;
3. Lo move e adictonan ambulante for di centro di ciudad y di e areanan pobla, y crea solucionnan efectivo a corto y largo plaso pa e problematica di e adictonan ambulante y di adiccion en general;
4. Lo modernisa nos leynan caminda cu ta necesario. Lo percura pa haci leynan mas accesibel pa Pueblo via internet;
5. Lo percura pa adapta leynan y maneho pa proteha nos muchanan di abusanon immoral y contra ley cu ta tumando lugar y castiga esnan cu ta haci nan mes culpabel na e tipo di actonan aki na un manera severo.

Salubridad

1. Lo promove introduccion di un "Diagnostic Center" pa testnan diagnostico por wordo haci mas liher;
2. Lo re-introduci un of mas cambenan di decompression ("hiperbaric chambers") cubri dor di AZV;
3. Lo modernisa e leynan cu ta regarda salubridad pa yega na un mehoracion di calidad di cuido medico y evita cu varios ciudadano ta frustra y ta haya nan ta bay busca atencion medico den exterior;
4. Lo stimula mas cooperacion medico cu paisnan den region y lo percura pa un sistema unda e diploma di nos studiantenan cu a gradua den medicina na e paisnan den region keda reconoci conforme e tratado di Mexico (Trb. 1976, 61);
5. Lo explora si por desaroya un "trauma center" na un parti central di e isla pa atende cu casonan cu ta rekeri atencion di cirugia medico urgente, cual lo ta mas accesibel pa tur distrito compara cu e actual 'polikliniek' na hospital.
6. Lo percura pa introduci un centro specialisa pa haci estudionan medico ("medical research") y pa combati cancer.

Poder di compra

1. Lo restaura e poder di compra y baha e peso di belasting riba nos pueblo via di reforma di belasting y disciplina fiscal;
2. Lo percura pa restitution di belasting na esnan cu tin pa haya placa bek wordo paga den un tempo corto y defini;
3. Lo explora reduccion di cierto belasting na un manera responsabel, e.o. e belasting riba herencia, 'winstbelasting' y 'inkomstenbelasting'.
4. Lo reduci na un manera responsabel e tarifa di belasting pa number di auto y taxi cu ta core riba diesel. Lo introduci un tarifa reduci special pa autonan clasico, manera ta e caso na e.o. Corsou y Hulanda;
5. Lo promove pa mas usuario cu ta desea por tin un meter prepago di coriente pa asina yuda na maneha e budget mensual;
6. Lo percura pa bin cu un miho control di prijs di comestibel, e.o. door di controlnan mas frecuente y di cual e resultadonan lo wordo publica debidamente.

Economia y Labor

1. Lo crea mas cuponan di trabow dor di e.o. simplifica e proceso di lanta negoshi y stimula e negoshinan fiscalmente cu ta diversifica nos economia. E estimulonan fiscal lo ta dirigi na crea crecimiento economico positivo y duradero;
2. Lo haci tur intento pa reapertura di e refinaria pa e.o. restaura e tantisimo cuponan di trabow cu a bay perdi;
3. Lo desaroya pilarnan economico nobo riba entre otro e tereno di servicionan dirigi na e mercado internacional cu uso di Internet ("ecommerce", "etrade", "apps", "intellectual property");
4. Lo explora con por promove mas trato igual na pia di trabow, entre otro pa wak con por adresa na un manera balansa e hecho cu varios persona di 45 aña bay ariba ta señala cu nan no ta haya trabow facil basa riba nan edad;
5. Lo bin cu estimulo fiscal pa e empresanan cu ta duna nan empleadonan oportunidad pa haya participacion den accion ("aandelen") di e empresa;
6. Lo destina fondo structural pa desaroya un economia comercial y duradero na San Nicolas y otro distrito;
7. Lo stimula pa medio un programa di tax credits establecimiento di companianan cu ta traha cine, videoclips di musica etc. manera ta e caso na por ehempel Puerto Rico.

Turismo

1. Lo inverti mas den diversificacion di promocion turistico; buskeda di rutan nobo y socionan strategico, pa asina reduci e dependencia di e economia di Merca;
2. Lo concentra mas riba e asina yama "niche markets" y mercadonan den e region;
3. Lo crea facilidad pa desaroya turismo di curso y seminario;
4. Lo crea un maneho practico cu lo trece un solucion berdadedero y balansa pa tur esnan cu ta brinda servicio turistico riba beach;
5. Lo rebaha airport tax pa vuelonan entre e islanan den Reino Hulandes na un nivel mas pagabel y lo sigui explora introduccion di "pre-clearance" ora biaha pa e islanan asina pa promove mas turismo entre e islanan;
6. Lo kita e tarifa anual cu airport ta cobra taxistanan pa yega riba tereno di airport.

Educacion

1. Lo percura pa e muchanan tin buki di miho condicion y calidad pa uzo na scol. PDR lo percura unda cu ta necesario pa tin un 'boekenfonds', pa kita e peso for di e mayornan;
2. Lo percura pa duna mas subsidio of asistencia unda mester pa promove cu tur mucha cu ta bay scol tin un desayuno basico, den caso cu mayornan dor di poco recurso no por cumpli cu esaki;
3. Lo percura pa un tipo di "scholarship" pa studiantenan di scol avansa aki na Aruba, cu ta procedente di famianan di menos recurso, pa yuda cubri tur nan gastonan necesario di estudio;
4. Lo explora si por introduci "Summer School" pa e studiantenan cu ta 'bespreekgeval', pa purba reduci e fenomeno di "keda sinta" of "druip";
5. Lo promove introduccion di un instituto pa preparacion pa pasa "Staatsexamen" pa asina garantisa cu esnan cu tin e deseo pa sigui estudio avansa por logra nan maximo potencial.

Asuntonan social

1. Lo percura pa un miho integracion di e servicionan social y di salud cu ta un condicion primordial pa e desaroyo di un sistema cu ta responde na e necesidadnan di nos Pueblo;
2. Lo introduci ley pa reorganisa debe personal ("landsverordening voorkoming onnodige insolventies") y ley pa limita embargo riba salario minimo, pa garantisa un nivel di bida y preveni problema social ("landsverordening tot garantie van een bestaansminimum").
3. Lo implementa e tratado di derecho pa e personanan cu cierto limitacion ("VN Verdrag voor personen met een (functie) beperking");

Vivienda social

1. Lo percura pa FCCA por concentra riba e meta central pa cual el a wordo funda: traha casnan social pagabel. Lo elimina obstaculonan innecesario pa por logra esaki;
2. Lo haci un maximo esfuerzo pa construi durante e periodo di gobernacion di 4 aña mas tanto casnan social cu ta posibel;
3. Lo percura pa baha e interes di e hipoteca di FCCA;
4. Lo revisa e sistema, a base di cual un aplicante ta bin na remarca pa haya un vivienda social, pa uno mas husto y transparente.

Deporte

1. Lo mehora e calidad di e facilidadnan di training y stimula mas participacion di e pueblo den e actividadnan deportivo, hisando e subsidionan pa deporte y traha mas eficiente cu sector priva;
2. Lo sigui stimula, engrandece y enriquece tur e deportenan di e asina yama 'piramide' deportivo (deportenan masivo y recreativo, deportenan escolar, deportenan competitivo y di halto nivel), sin lubida nos deportistanan cu limitacionnan fisico y/of mental;
3. Lo bin cu proyectonan innovativo pa deporte aporta substancialmente na nos economia y area laboral. Lo trata na yega na un Centro di Halto Rendimento pa asina nos top deportistanan por practica nan deporte cu tur e medianan necesario na nivel halto, incluyendo acuerdonan (cooperacion) cu nan scol of trabou;
4. Lo percura pa restaura e funcion di e Centronan di Bario, locual ta e centronan activo pa e encuentronan social y di deporte;
5. Lo stimula e deportenan di ehercicio mental (p.e. dam, ajedrez, domino etc.), cualnan a muestra di ta contra aresta malesanan manera demencia, Alzheimer's y ADHD.

Agricultura y pesca

1. Lo stimula establecimiento di mas compania cu e meta di agricultura/pesca;
2. Lo adapta ley pa esnan cu ta practica e deporte di pesca cu harpoen por haya permiso pa practica e deporte aki atrobe den e areanan destina, y asina rebiba e deporte tradicional aki.

Nos Grandinan

1. Lo percura pa e pensioen wordo paga na tempo y lo crea incentivo pa baha e peso di gasto pa nos pensionadonan, por ehempel door di introduci un carhi di descuento riba e servicionan publico;
2. Lo introduci un sistema di 'reverse mortgage'. Asina e pensionadonan cu ta desea esaki por uza un parti di e balor di nan cas como un entrada mensual;
3. Lo restructura e sistema di belasting, pa evita cu esnan cu ta desea pa sigui traha wordo confronta cu un peso desproporcional di belasting;
4. Lo amplia e cuido geriátrico ("klinische geriatrie").

Hubentud

1. Lo ekipa y organisa e departament un manera mas efectivo y cu fondo embaraso hubenil, "dropouts", fal di nos hubentud;
2. Lo stimula e cursonan di capacitacion basico, unda hobennan por sigui desaroya nan mes pafo di e curriculum escolar;
3. Lo introduci un programa di atardi pa estudiante, cu lo inclui deporte, arte, musica, etc., dependiendo di e talento y e deseonan di e estudiante;
4. Lo crea un programa di motivacion pa yuda nos hobennan enfrenta nan retonan.

Infraestructura

1. Lo soluciona e problema di stagnacion di trafico cu alternativanan efectivo y economico, cual por wordo efectua na un manera facil;
2. Lo percura pa duna prioridad pa pone camindanan asfalta na e mas di 160 cayanan rond di Aruba cu actualmente tin caminda di santo.

Desaroyo teritorial

Lo percura cu e ley di zonificacion wordo actualisa y ehecuta na un forma corecto, caminda esnan afecta por haya un compensacion husto.

Medio ambiente

1. Lo percura pa modernisa nos leynan ambiental;
2. Lo bin cu un solucion efectivo y duradero pa e dump na Parkietenbos y nos maneho di desperdicio en general;

Calidad di gobernacion y Finanzas publico

1. Lo promove 'e-government' pa e ciudadan no por aplica online pa servicionan publico y comunica mas efectivo cu e departamentonan di gobierno. Esaki lo reduci hopi procedura administrativo innecesario unda e servicio di gobierno lo mehora y ciudadan no lo mester warda hopi tempo pa un contesta of decision di gobierno;
2. Lo re-introduci presupuesto separa pa cada ministerio. Asina cada minister por wordo teni responsabel pa su maneho na un forma mas eficiente.
3. Lo introduci ley di compensacion pa esnan cu wordo afecta ora cu trabownan di infraestructura ta dura mas cu 6 luna ("Wet schade'oosstelling bij rechtmatig overheidshandelen").
4. Lo promove un aparato gubernamental cu menos 'coordinador' of 'deskundig advies'. Esaki lo yuda na reduci gastonan y nos ta di opinion cu tin suficiente profesional den nos aparato gubernamental cu por haci e mesun trabou;
5. A base di e puntonan menciona den e capitulo di Economia y Labor lo crea pilarnan y desaroyo economico nobo cual directamente y indirectamente lo trece entradanan adicional pa finanzas publico;
6. Lo combati y preveni corrupcion stipulando den ley cu no por desvia di bay un destaho publico pa e proyectonan grandi, cumpliendo asina cu e criterionan internacional di transparencia y bon gobernacion. Lo modernisa e ley di Comptabilidad.

Defensor di Pueblo

Lo crea un instituto di Defensor di Pueblo (Ombudsman). Asina e pueblo lo tin un instancia independiente unda e por entrega un keho referente e funcionamiento di e servicio di gobierno.

Democracia participativo

Lo introduci un 'Referendumwet' caminda lo consulta pueblo den caso di asuntonan importante cu ta regarda henter e comunidad.

Cultura

1. Lo crea un maneho integral di nos cultura cu lo mester crea un impacto educativo, social y turistico pa conserva y promove nos cultura y identidad;
2. Lo introduci proyectonan innovativo pa cultura aporta substancialmente na nos economia y area laboral y stimula nos producto Arubiano riba nivel nacional y internacional. Aruba mester bira un centro cultural di Caribe;
3. Lo stimula e incorporacion di actividadnan cultural den tra'i merdia di scolnan (basico).

